

# JONES, REES JENKIN (1835 - 1924), pregethwr, ysgolfeistr, hanesydd, emynydd

**Enw:** Rees Jenkin Jones

**Dyddiad geni:** 1835

**Dyddiad marw:** 1924

**Priod:** Anne Jones (née Griffith)


**Rhiant:** John Jones

**Rhyw:** Gwryw

**Galwedigaeth:** pregethwr, ysgolfeistr, hanesydd, emynydd

**Maes gweithgaredd:** Crefydd; Addysg; Hanes a Diwylliant; Llenyddiaeth ac Ysgrifennu; Barddoniaeth

**Awdur:** John David Jones

Ganwyd 17 Medi 1835, mab hynaf [John Jones](#) (1802 - 1863), Aberdâr. O du ei fam hanoedd o [Jones iaid](#) Llwynrhys, arloeswyr Anghydfurfiaeth yng Ngheredigion. Addysgwyd yn ysgol ei dad, Coleg Presbyteriaid Caerfyrddin (1855-9), Prifysgol Glasgow (1859-62); graddiodd yn M.A., 1863. Cymerth le ei dad (bu farw 19 Rhagfyr 1863) yn yr ysgol a'r pulpud, ac yn Ionawr 1864 derbyniodd alwad unfrydol yr eglwys. Bu'n weinidog o 1864 hyd 1872, pryd yr ymddiswyddodd oherwydd diffyg iechyd, ond ni bu'n segur. Bu'n golygu *Yr Ymofynydd* o 1873 hyd 1879, yn aelod o'r bwrdd ysgol (1874), yn athro yn y clasuron (ac yn gweithredu fel prifathro) yn y Coleg Presbyteriaid, Caerfyrddin (1876). Yn ei ddosbarth yr oedd '[Walcyn Wyn](#)' ac E. Griffith Jones. Yn 1879 ailgydiodd yn ei hen ddyletswyddau ym mhulpu yr Hen D Cwrdd a'r Trecynon Seminary (yn iaith y werin ' Ysgol Jones'). Ymhlith ei fyfyrwyr bu ([Syr](#)) [T. Marchant Williams](#), [Pennar Griffiths](#), a T. Botting. Ymddeolodd o'r weinidogaeth yn 1909. Priododd Anne (bu farw 7 Mawrth 1899), merch Evan Griffith, The Poplars, Aberdâr, a bu iddynt bump o blant. Golygodd *Yr Ymofynydd* (yr ail waith) o 1881 hyd 1887. Cyhoeddodd *Emynau Mawl a Gweddî*, 1878, *Emynau ac Odlau*, 1895 (y rhan fwyaf yn gyfieithiadau o'i eiddo), *Unitarian Students, 1796-1901*, 1901, ysgrif yn *Encyclopaedia of Education* ar ' Davis Castell Hywel and his school,' ysgrifau yn *D.N.B.*, a mwy nag 20 o draethodau ar destunau diwinyddol. Ysgrifennai yn gyson i'r Wasg, yn bennaf ar faterion hanesyddol; gweler *Yr Ymofynydd*, *Y Geninen*, *Cymru (O.M.E.)*, [Cyfaill yr Aelwyd](#) , *Unitarian Transactions*, gwasg leol Aberdâr a'r cylch. Dynodir ei gynhyrchion gan amlaf gan R.J.J., S.N.S., T.C.U. Gadawodd ei lawysgrifau i Lyfrgell Caerdydd a Lyfrgell Genedlaethol Cymru. Bu farw 15 Hydref 1924.

## Awdur

Y Parchedig John David Jones, (1898 - 1959)

## Ffynonellau

*Yr Ymofynnydd*, 1894, 73

*The Christian Life*, 25 Hydref a 8 Tachwedd 1924

*Yr Ymofynnydd*, 1924 178

*The Unitarian Students at the Presbyterian College, Carmarthen ... 1796-1901* (1901), 66

*Oriel Coleg Caerfyrddin* (1909), 85

## Dolenni Ychwanegol

Wikidata: [Q20734202](#)

**Dyddiad cyhoeddi:** 1953

**Hawlfraint Erthygl:** <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.